




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

APERILA 2017

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## OLA FAAPA'IAINA

*saunia e*

**Rev. Dr. Aukilani Tuiai FS**

Faiaoga o le Tala Faasolopito o le  
Ekalesia  
Kolisi Faafaifeau i Malua

O le autu o leni pepa o le 'Pietism',  
e sau mai le upu Latina 'pietas', e  
faauigaina o le usitai, faamaoni,

amiotonu poo le amio atua. Ua ou  
faaaogaina le 'piety' i le uiga faatala-  
*faaaauau itulau e 2*

### Heart Attack!

#### Ua Pe le Fatu!

Na pupula o'u mata ma ou  
iloa atu ai le teine tausima'i o  
punou ifo i o'u luga, popo lo'u  
lima ma fai mai, "Aua e te  
popole, "You're okay!"

*faaaauau itulau e 10*

O le Mafuaaga o le Pese:

### Rescue the Perishing

*faaaauau itulau e 9*

**"Faamolemole,  
o Oe o le Atua?"**

*"Sir, Are You God?"*

*silasila itulau e 6*



**ARMENIA** - le ulua'i malo o le lalolagi na latou  
avea le lotu Kerisiano ma a latou lotu aloa'ia, i le tausaga

*ATA: se tasi o malumalu i Armenia*

*silasila itulau e 4*

**Galuega Lavea'i  
Faale-Tala Lelei**

*saunia e*

**Puletua Tapumanaia FS**

**EFKS Falelauniu**

*faaaauau itulau e 11*

O le Teine Kerisiano Ma'a'a le Loto

**A French Christian  
Heroine**

**Marie Durant**

*silasila itulau e 5*

# OLA FAAPA'IAINA

*mai le itulau muamua*

faasolopito, e faauigaina o le amiolelei (morals) ma mataupu silisili (principles) o le ola usiusita'i i le Atua.

O le taumafaiga a le Ekalesia Porotesano i le senituri e 17, e toe faaolaola ai le olaga faatuatua poo le olaga tapua'i o tagata i le Atua. Sa faaaogaina e ta'ita'i o le Ekalesia Porotesano i lea vai taimi le auala poo le metotia e ta'ua o le 'pietism', lea e pei ona faamatalaina, o le ola faapa'iaina, ola e faia le finagalo o le Atua, poo le ola usiusita'i i le Atua.

***Atonu e mafai ona fesiligia le taua o leni pepa i le galuega faafaifeau; pe fesiligia foi se aoga o le Tala Faasolopito o le Ekalesia i le galuega faafaifeau. Ae ou te manatu, e aoga le Tala Faasolopito o mea sa tutupu, e toe faamanatu ma fafagu mai ai ia i tatou nisi vaega taua i le galuega faa-faifeau.***

O le senituri e sefulu fitu (1600-1699TA), sa tupu ai le taua tele i totonu o Siamani e ta'ua o le 'Taua o le Tolu Sefulu Tausaga' (1618 e oo i le tausaga e 1648). Sa mafua leni taua ona ua taumafai le lotu Katoliko e aveese le lotu Porotesano mai totonu o Europa. E toatele tagata sa malilili i leni taua, ae le'i mafaia e le Lotu Katoliko ona aveesea le Ekalesia Porotesano mai Europa. O le i'uga o leni taua, ua tele le afaina o le Ekalesia Porotesano, aua sa toatele tagata na malilili, o tamaiti ua leai ni aiga, o matua ua malilili fanau, ma ua manatu tagata i lea taimi, ua mafua nei taua ma fevaevae'iga ona o le Lotu. O le mafuaaga lea ua tele ina o ese ai tagata mai le Lotu Porotesano i lea vai taimi.

O le fesili sa tula'i mai i ta'ita'i o le Ekalesia i lea vai taimi: "E faapefea ona toe faafo'i mai i le Lotu?"

Sa iai i Siamani i le tausaga e 1666 se alii faifeau o Jacob Spencer. Sa vaia ma le faanoanoa e leni faifeau le o ese o tagata mai le Ekalesia Porotesano, ina ua mae'a le Taua o le Tolusefulu Tausaga. Sa saili e Spencer se auala e toe faaolaolaina ai le itu faale-agaga o tagata, ma sa tusia lana

tusi o le 'Pious Desires' poo 'Mana'oga o le Ola Faapa'iaina'. E manatu Spencer, o le ola faapa'iaina mo le Atua e mana'omia ai le:

1. Sa'ili ma su'esu'e le Tusi Paia ma ia saunia lauga e manino ma faigofie ona malamalama ai tagata, ina ia faalototele ma toe maua mai e tagata le faamoemoe ola mai le Atua.

2. ***Ia saili ma faata'ita'i i upu e laugaina, (practice what you preach). Ia mafai ona fesoasoani i tagata e mana'omia le fesoasoani e pei o tagata matitiva, o tamaiti ua matuaoti, o fafine ua malilili a latou tane.***

3. ***E taua le ola a'oa'oina o faifeau ma tagata lotu i le Tusi Paia, ina ia faamallosia le ola faale-agaga o tagata uma.***

4. Aua le aafia i misa ma fevaevae'iga i talitonuga poo lotu eseese.

O auala poo metotia ia sa faataua e Spencer i le senituri e sefulu ma le fitu. I le faaiuga o le senituri lea, sa toe faaopoopo ai e nisi sa faaauauina le galuega a Spencer, e pei o August Frank, nisi auala e maua ai le ola faapa'iaina mo le Atua.

1. Ia lagona e le tagata i totonu o lona loto le fiafia e fesoota'i ai ma le Atua. O se faata'ita'iga - o le faataua o pese ma viiga i le Atua, ina ia mafai ai e le tagata ona maua le fiafia e fesoota'i ai ma le Atua.

2. E faataua le ola tatalo.

3. E faataua le ola faalagolago i le Agaga Paia.

4. ***E faataua galuega faamisiona poo galuega tala'i. O lona uiga, e momoli e le faifeau le upu a le Atua i tagata, ae le faatalitali mo tagata e o mai i le Ekalesia.***

O le senituri na sosoo ai, sa taumafai ai foi se isi faifeau mai le Lotu Egelani o Ioane Uesile, i se auala poo se 'metotia' e toe faafo'i ai tagata i le Lotu. O le toatele o tagata o lea senituri sa manatu, o taua ma fevaevae'iga o lea vai taimi, sa mafua ona o talitonuga ma tapua'iga eseese. O se tasi lea o mafuaaga taua sa tele ina o ese ai tagata mai le Ekalesia Porotesano. Ua tele ina liliu ese tagata mai le Lotu Kerisiano, ae aga'i i le

faasaenisi, aua se tali mo o latou faafitauli. Sa manatu foi tagata, e le tutupu ni taua ma fevaevae'iga mai le faasaenisi, ae tele ni mea fou poo *inventions* sa maua mai le faasaenisi e pei o le 'steam engine'. O le mafuaaga lea sa tele ina liliu ese ai tagata mai le Ekalesia i totonu o Egelani. A o le galuega fita lea sa feagai ma Ioane Uesile, o le taumafai ina ia maua se fofo o le faatupula'ia o le o ese o tagata mai le Lotu Egelani.

Sa malaga Ioane Uesile i le vaa i Amerika i le tausaga e 1735. Sa afatia le faiga malaga ma toetoe a goto le vaa i le malosi o le afa. Sa manatu Ioane Uesile, e le mafai ona faasaoina i latou uma sa malaga, ua na o le fe'i ma alalaga tagata, ona toe lava a goto le vaa. I le vevesi ma le le mautonu o tagata, sa faalogoina e Ioane Uesile ni pesepesega a se vaega sa i luga o le vaa. O i latou sa pepese o tagata mai Siamani, ma ina ua fesiligia e Ioane Uesile pe aisea sa pepese ai ma le le fefefe, ae tali i latou faapea, o i latou e talitonu i le "Pietism" poo le ola faapa'iaina. Latou te faataua le pese e fesoota'i ai i le Atua, i lo latou manatu, e le tuulafoa'iina i latou e le Atua i taimi faigata. Sa faamautu ai loa le manatu o Ioane Uesile, o le ola faapaiaina, o le auala lea e toe faafo'i mai ai tagata i le Atua.

Sa ia maua mai foi i nei tagata nisi o auala ma metotia, e mana'omia e maua ai le ola faapa'iaina, e pei o le lauga atu i tagata, poo le galuega tala'i.

***Sa fautuaina Ioane Uesile e toeaina o le Lotu Egelani i lea taimi, ina ia aua le tala'i atu i le lalolagi. Sa tali Ioane Uesile, o le lalolagi, o lana aulotu lea. "The world is my parish."***

Sa faaauau le galuega tala'i a Ioane Uesile i Egelani i tagata e le'i lolotu muamua, faapea ma tagata e le'i talitonu i le Atua.

E le'i faigofie le galuega tala'i sa feagai ma Ioane Uesile aua sa feagai o ia ma tagata sau ma nofoaga faigata. E le'i popole Ioane Uesile i aafiaga o lona soifua a o feagai ma le galuega tala'i. Sa faate'ia o ia ina ua ia molimauina le pa'i atu i tagata o le upu folafola. Sa faamalieina ma fiafia tagata i le loto tele o Ioane Uesile e tala'i atu le finagalo o le Atua, tusa lava pe tele faafitauli ma faigata sa

*faaauau itulau e 4*

# O LE LAUGA

O le lauga i le suafa mamalu o le Atua le Tama, le Alo ma le Agaga Paia, Amene

Matua : 2 Korinito 4:10

*“o loo tauave i le tino e le aunoa le fasiotia o le Alii o Iesu ina ia faaalii foi le soifua o Iesu i o matou tino”*

**Manatu Autu: O Keriso o le mamanu o le ola o le Kerisiano**

E fa'aalia e le tatau a le tama po'o lana pe'a o ia o le Samoa. O lana tatau foi ma ona mamanu e tofu ma le uiga, e ola foi la ma magafagafa i ona tiute ina ia aua nei pa'ela pe faaletonu lana pitolaau. E le o se tatau e teuteu ai le tino pe na ta ona o se isi mafuaaga. E tatau ona faaalii i lona ola tiute e ao ona faatinoina o ia o le tautua. O le galuega o aso uma, e le o se galuega e faifai tuu ua le lava, e ofoina atoa i ai le soifua ma le ola.

E faapena le lagona o loo tau faamanino mai e le Aposetolo o Nuu ese, o lona ola ua uma ona mamanuina e le soifua o Keriso Iesu. O ona manu'anu'a lea ua ia tauaveina i lona soifua. Ua ia ta'utino e le mafai ona faavaivai i le tala'iina o le Talalelei ia Iesu Keriso, lea ua tauau e faaseseina ai Korinito, ma ua lualuagia ai le tala ia Iesu.

E le o po foi se silafia i puapuaga e tele na oo i le Aposetolo, o sauaga ma le faifaiupu o tagata, ae o le tele o ana folauga na pa'ulia ai vaa na folau ai, ma tauau e uma ai lona ola.

Ua tautino foi le tele o puapuaga o mea sa fa'aatuatuvaleina ai i latou, ae lei mafai ona atuatuva-

le sa fememea'i ae lei matua fememea'i, sa sauaina ae lei tu'ulafaoina, sa lafotuina ae lei fano.

O loo faaalii manino ai e Paulo, o le ola o le tagata ua mamanu e Keriso, e le popole aua o loo 'u'umau e le Alii i lana puipuiga.

Le Ekalesia pele, o Kerisiano o e ua valaauina e le Atua mo lana feau. O lou soifua ma lou ola e tatau ona faaalii ai le soifua o Iesu. O le ola faapaiaina, o le alofa, o le agalelei, o le loto maualalo, o le loto fesoasoani ma uiga uma na faaalii e le soifua o Keriso.

O le mamanu lea e tatau ona faaalii i o tatou olaga. Ia faasusulu atu Iesu e ala i lau amio lelei.

Le ola tauivi ma le olioli i puapuaga, le soifua ofoina atoa, na taualuga i le satauro, e lei faigofie le ala i le faaolataga na saunia e Keriso mo i tatou. O le ituaiga soifua ofoina lea e tatau ona ola ai le kerisiano faamaoni. 'Aua le sola ese ma mea faigata o le ola auauna.

Ua le na ma le laina lo outou soifua auauna i soo se ala, aua le tautuaina o le feau ma le galuega a le Atua. O le mea moni, e le o misi foi ma le au faitio ma le faifaiupu, e tau faaleaga ai le galuega lelei ua faia i Ekalesia ma aulotu.

O le tuualalo a le failauga, ia mau le to'ovae, auā o oe ua mamanuina e Keriso. Ia tau'ave i o tatou tino manu'anu'a ma ma'ila'ila o le Faaola, le soifua na asaina puapuaga, auā o lea lava e talanoa ai le Aposetolo. O puapuaga mamasagia ma le vave mavae, e saunia ai mo i matou le

mamafa o le mamalu faavavau, e matua silisili ese foi.

O puapuaga e mavae, ae tatou te selesele i le mamafa ma le tele o ana faamanuiaga mulimuli ane. E māmā puapuaga i le tagata ua mamanu e Keriso le ola.

O lo tatou vaivai e faatumauina ai le agaga o le Atua i luga o i tatou, lea lava e mitamita ai le Aposetolo i mea e vaivai ai. O a mea matuitui na fai mai e tagata ia te ia, fai mai le Aposetolo o le alofa tunoa ua lava lea e fesoasoani ia te ia, auā a ou vaivai ona ou malosi ai lea.

A uma se mamafa o se galuega, tatou te lagona le fofo'e faavi o le lelava ae faatupuina le malosi fou mai le Atua.

Ua taoto mai tiasa matua na latou asaina fita o le galuega. Na pei o se mea fiafia ia i latou le tautua o le lotu.

Le Ekalesia e, tatou galulue punoua'i, auauna ma le loto fiafia i le loto e mama. 'Aua le avaga gofie lou talitonuga i le taifana'e mai o talitonuga eseese ma le pola e motu i tua. Ia tumau i lou faatuatua le galuega e uma ai lou soifua ma le ola.

Ia manatua le auuso e, aua nei mamanuina oe i se isi lava mamanu ua na o Iesu o le mamanu e matagofie, e mo'omia e tagata uma. E le o le ta'u o le Kerisiano ae mamanu e le tiapolo le ola. O le mea lene e ta'u o le pepelo i le Atua. E tele pea a ta feau aua le lumanai o la ta Ekalesia, e tumau le maopopo o le Ekalesia ina ua matua olaola le mamanu o Keriso i lou soifua auauna. O ia lava na saunia le faaolataga tele mo oe ma au. Amene

Saunia: Momo'e Gagaeolo FS  
EFKS Siuniu

# OLA FAAPA'IAINA

## *mai le itulau e 2*

feagai ma ia. Sa amata lemu ai ona toe fo'i ane tagata i le Lotu Egelani.

Sa faaauau ona faaoga e Ioane Uesile isi auala ma metotia 'faa-Pietism' e pei o pesepelega sa fatuina e lona uso o Salesa (Charles Wesley) i taimi o lauga ai. Sa faataua foi e Ioane Uesile le faamalosi o le ola tatalo ma le faalagolago i le Agaga Paia. Sa ia u'una'ia foi mafutaga a tagata lotu e faitau ma sailiili i le Tusi Paia ma lauga o Aso Sa. Sa ta'uta'ua ma iloga auala sa faaogaina e Ioane Uesile e faafo'i ai tagata sa liulotu, ma liliu ai isi tagata i le Lotu Egelani, ma ua faata'ita'i ai foi ma le toatele o faifeau. Sa toatele faifeau sa galulue i nofoaga e iai tagata e le'i lolotu. O le vaega sa sili ona ta'uta'ua ai le galuega tala'i a Ioane Uesile, ona ua toatele tagata ua faatino a'oa'oga sa maua mai i lauga sa faalogo iai. Sa faia pea lenei galuega taua se'ia oo ina fitusefulu tausaga o lona soifua.

O se tasi tagata sa faatino a'oa'oga sa maua mai i lauga a faifeau o lea vai taimi, o William Wilberforce.

O William Wilberforce sa avea ma faipule o le Malo o Peretania i lea vai taimi (1780) o le malosi o tagata i le olaga 'faa-Pietism'. Sa faapena ona tosina William Wilberforce e ola i lenei olaga faapa'iaina ma faia le finagalo o le Atua. Sa ia matauina ma le faanoanoa le faatauina o tagata pologa (slave trade) mai Aferika. Sa ia taumafai malosi e taofia lenei faiga faapologa ma faale-alofo e ui ina sa fautuina o ia, e faigata ona ia taofia le faatauina o tagata pologa, ona o le to'atele o tagata taualoa ma tagata mau'oa e iai a latou pologa. Ae peita'i, sa tumau pea le finau o William Wilberforce i lona manatu, o le finagalo lea o le Atua. E ui ina lamatia lona soifua ma sosola ese ana uo ma ia, ae le'i faavaivai ai William Wilberforce e tafiese le faapologaina o tagata Aferika. E 30 tausaga o taumafai pea lenei alii, i le faato'a pasia ai le tulafono i le Palemene o Peretania e taofia ai le faapologaina o tagata Aferika i le tausaga e 1833, ae toe lua masina maliu William Wilberforce.

O nisi alii sa tele le talitonuga i le ola usiusita'i i le Atua (Pietism) e iai Anthony Ashley Cooper i le seneturi e 19. O Ashley Cooper sa faaoga lona tamaoiga e fesoasoani ma faaleleia ai le tausiga o tagata e faaletonu o latou mafaufau (1828-1877). Sa faaoga lona tulaga i totonu o

le Palemene, e faaleleia ai le tulaga o tagata faigaluega, ina ia lava le taimi e malolo ai le tagata, ona sa galulue faasoloatoa tagata mo le 24 itula. Sa fesoasoani foi Ashley Cooper ina ia pasia le tulafono, e faasaina ai tama'ita'i ma tamaiti e galulue i lua e 'eli ai minerale (mines) 1842).

O nisi ia o alii ta'uta'ua i totonu o Peretania, sa faia galuega lelei ina ua talitonu i le olaga 'faa-Pietism', o le ola faapa'iaina, poo le ola usiusita'i ma faia le finagalo o le Atua.

Fai mai le tasi faifeau ta'uta'ua o Peretania o Charles Spurgeon, "A mae'a ona e faafofoga i la'u lauga, o le mea e sili ona taua i le lalolagi, o le lauga a ou vae ma ou lima, i lau savali ma lou soifuaga. O le manatu o le faipepa, o le mafuaaga lea sa malosi ai Peretania i le seneturi e sefulu valu ma le sefulu iva, ona o auala ma metotia sa latou faaogaina, o le ola usiusita'i i le Atua. Sa faapena foi ona faaoga e tagata Amerika le *Pietism*, ma o le tasi lea o mafuaaga ua malosi ai le lotu i totonu o Amerika seia oo mai i lenei vai taimi.

I le aotelega o lenei pepa, o le Pietism o le ola faapa'iaina, o le ola usiusita'i i le Atua, o le ola e faia le finagalo o le Atua. E faaoga e le Pietism auala ma metotia e pei o le

i. ola tatalo

ii. pesepelega ma viiga i le Atua

iii. faalagolago i le Agaga Paia

iv. su'esu'e ma sa'ili'ili i Afioga Paia a le Atua.

v. faafaigofie ona laugaina le upu a le Atua ina ia maua e tagata le faamoemoe

vi. a'oa'oina faifeau ma tagata i le finagalo o le Atua

vii. faatino a'oa'oga uma e maua mai Afioga Paia a le Atua e pei o le fesoasoani atu i tagata puapugatia.

O le fesili, poo faataua ea e i tatou lenei auala (Pietism) e faafo'i mai ai o tatou tagata i le Ekalesia, ma taofiofi ai le liliu ese o tagata i isi tapua'iga? E tofu lava le tagata ma lana tali.

E tele tapua'iga fou i lenei talutalufou. Ua tele foi faatosina mai isi lotu eseese e taumafai e avatu le autalavou ma fanau iti ia latou tapua'iga, e le gata i Samoa nei, a o atunuu i fafo. A o le faamanatu, ina ia tatou mataala i mea sa tutupu, e a'oa'oma ai ia i tatou nisi auala ma metotia e faaogaina, e taofiofi ai le liliu ese o tagata maile Ekalesia. E le o ni auala poo ni metotia fou, a o le fagufagu ma le toe faamanatu, e taua le savali ma faata'ita'i i upu o laugaina, (*practice what you preach*). E pei ona fetalai o lo tatou Faaola: *Se a ea le mea e ta'ua ai a'u e outou, Le Alii e, Le Alii e, ae tou te le faia mea ou te fai atu ai*" (Luka 6:46)

(published with permission from the Malua Theological College)

## ARMENIA

### *mai le itulau muamua*

Mesia 301AD. E na o le tolu miliona tagata o lea atunuu. Ae matua tele lona sao i le amataga mai o le Ekalesia Kerisiano i le lalolagi. E 95% o tagata Armenia e Kerisiano.

E tusa ai ma tala tuu, o le uluai ta'ita'i o le Ekalesia Aposetolo Armenia o Gregory the Illuminator, o le atalii o se tamalii e igoa ia Anag, o ia lea na na fasiotia le tupu o Armenia o Khosrov II. Na faasalaina i le oti le tama o Gregory ona o lea mea, ae na sola Gregory ma nofo i le epikopo o St. Firmilian ma sao ai.

Na matua Gregory ona foi lea i lona nuu ma lona faamoemoe e taumafai e liliu le tupu o Armenia i le lotu Kerisiano, ma liliu atu ai ma tagata o Armenia. Peitai ina ua logotala le tupu o Tiridates III, le atalii o le tupu lea na

fasiotia, ona ia pu'eina lea o Gregory ma tuu i le falepuipui. Na fai atu le tupu ia Gregory a le faafiti i le lotu Kerisiano, e le toe magalo. Ae le talia e Gregory. E tusa ua atoa le 13 o tausaga o falepuipui Gregory, a o tausaga foi ia na ia taumafai ai e faakerisianoina le tupu o Tiridates, ma oo lava ina faaolaina ma avea ma Kerisiano le tupu o Tiridates III. Ma o le tausaga Mesia 301 na faatulafonoina ai e lea tupu le avea o le Ekalesia Kerisiano ma lotu aloa'ia a le malo o Armenia. O le isi igoa o le lauelele lea o iai Armenia, i tausaga lumana'i le Mesia, o Ararata, lea e iai le mauga o Ararata, lea na pa'ulia ai le vaa o Noa. E tele lava la le sao o Armenia i le itu faaleagaga o le Tala Lelei, e ui lava o se atunuu laititi.

# O le Teine Kerisiano Ma'a'a le Loto A French Christian Heroine Marie Durant

O lona igoa lena, Marie Durant, ua lauiloa ai e le lalolagi. O le toa, pei o se tagata toa i se taua. A o le toa lena, o le toa Farani. Na fanau i Farani. Faafailele i Farani.

A French heroine

O le Toa Kerisiano. Kerisiano Porotesano. E le'i atoa le 20 ni ona tausaga ae amata aliali lona loto toa. Loto mausali ma le lu'ilu'ia gofie. Laitiiti, ae loto ma'a'a! Teine muli, talavou, ae le fefe! Na o le 17 ona tausaga, ae tumu le ulu i moomooga. Tumu le loto i miti. I se tasi aso, na oo mai ai lona tofotofoina.

O Marie o le Kerisiano Porotesano, i vai taimi o pulea e tagata Katoliko Roma ia Farani. O se Hukenoti (Huguenot), o se vaega o Kerisiano Porotesano totoa ma le le fefefe i vai taimi o sauaina i latou e le pulega a tagata Katoliko Roma.

O le to'atele o tagata Hukenoti, sa fetulitulia'i i mea sa lalafi ai, i aai, i le vaomatua, ma sauaina, ma faasala i le oti nisi e toatele o latou na maua; i lea vai taimi i le talafaasolopito o le atunuu o Farani. O se vai taimi faigata e matua faanoanoa ai pe a mafaufau atu iai.

E le taumate e latou te fasiotia foi Marie, pe ana latou le alolofa iai ona o lona laititi tele, ma o ia o se teine ae le o se tama. E fiu e faasufi Marie i ona talitonuga ae le maluelue le ma'a'a o lona loto mau. E fiu i faafefe! Sasa tigaina, ae le maluelueina lava le loto mau o le teine. Na togi i le falepuipui se'i ona iloa ai lona fia loto ma'a'a. Ae atili ai le loto ma'a'a. Na faapea latou a umi ni aso o falepuipui ua suia ai ona uiga, ae

leai. Aua o le teine lea o le Kerisiano loto mau. E ma'a'a le loto ona o lona talitonu i lona Matai, o le na onosa'ia foi faasalaga matuitui ma le a'ia'i ae le'i suia ai lona loto. O lona Matai na maliu ona o le sala ulua na faati'eti'e ia te ia. Ma e ui lava i le mamafatu o le sala ulua, ae na fetalai mai lava i lea taimi o ona puapuaga, ina ia faamagalo i latou o loo tu'itu'ia fao, ma sunu'i le tao, ma faapale i le paletuitui; ma tuufeanu i ona fofoga; ma tauemu ma sasa. Leai se tau ma sui ae na o le fetalaiga: "Lo'u Tama e, ia e faamagalo atu ia te i latou, aua latou te le iloa le mea o latou faia."

O le Alii na fetalaia ia upu, o le Alii lava lea o le teine talavou loto mau. E ui ina talavou le teine ae na ia iloa lelei lava le Alii o ia faatuatua ma talitonu iai.

Na fiu e faasufi e usitai muamua i le Pope, ma patele, faato'a faalogo ai i le Alii o Iesu Keriso. Ae mausali le loto o le teine. Fiu i faafefe i malaia e oo iai pe a oo i le lagi ae le usitai lava. Ona na ia talitonu e sese mea o latou faia, e ui lava o latou o tagata o le lotu. E ui lava sa ia i latou le malosi e sauaina ai o ia, ae leai so latou malosi e pulea ai lona mafaufau ma lona agaga. O le mea lea e ui lava o falepuipui, ae i lona talitonuga, o loo sa'oloto lava lona mafaufau.

Na o le 17 ona tausaga ae amata faafalepuipuiina o ia. Sau ia tausaga, te'a atu ia tausaga, e le maluelueina lava le loto o le teine talavou. Ona ua uma ona fai lana ta'utinoga. Ma o lana ta'utinoga mo lona Alii, na fesoasoaniina e le mana o le Atua Silisiliese.

E na o le 17 ona tausaga ae lafo i

le falepuipui. Ae 54 ona tausaga ae faato'a tatala mai i tua. E 37 tausaga na le mafuta ai ma aiga, uo, ona e le maluelue lava lona talitonuga, e sese mea o loo fai e le lotu.

O se tasi mea na fai e Marie na oo ina lauiloa mulimuli ane e le lalolagi atoa, o lona tusia lea o se upu i le gagana Farani i le puipui o lona potu i le falepuipui. O le upu "RESISTEZ". I le gagana Peretania: RESISTANCE.

O lona uiga - "Tete!" Aua le faavaivai! I ni tausaga mulimuli ane, na avea ai lea upu e se ta'ita'i'au logologoa o Farani e fai ma ana pine i lona fatafata ma tagavai foi a le au Resistez a Farani, i le tausaga e 1940 o le vevela o le Taua Tele Lonalua a le Lalolagi. O le ta'ita'i'au - o General Charles de Gaul, lea na avea ma peresitene o Farani ina ua ola lea taua. O tagata sa mulimuli ia Charles de Gaul i le faatoilaloina o 'au a Hitila sa i Farani na latou faaogaina lea upu - RESISTEZ: (Resistance). TETEE! Na latou tau mo se sa'olotoga o lo latou atunuu o Farani na faato'ilaloina e 'autau a Hitila i le Taua Tele Lonalua a le Lalolagi - 1939-1945.

O le tala ia Marie Durant, o se a'oa'oga tele lava lea mo soo se Kerisiano - e iloa le mea sa'o, ona tutumau ai lea ma le le fefe i puapuaga tusa lava pe oo i le oti.

E mafai ona e tutumau ma finafinau e faia le mea tonu mo le manuia o tagata uma? Pe te alu foi i le ta'a'iga ma e auai i faiga pi'opi'o e matua mafatia ai tagata ae manuia ai na o se vaega?.

Matua olopala Europa i le malosi o 'au a Siamani, ae na tulei atu lava e 'au a Peretania ma malo na latou 'au'au faatasi, tulei mai lava mai Aferika i Matu se'ia oo atu i Perelini le laumua o Siamani, tulei mai au a Iapani mai le Pasefika ma Asia e 'autau a Amerika ma malo na latou 'au faatasi, se'ia oo i Tokyo, ma siilima ai Iapani. Ma ola ai le Taua Tele Lonalua a le lalolagi.

(George Fox: 1624-1691)

# O SIAOSI FOSI

## O LE NA IA FAASA'OLOTO LE AGAGA

O le mamafatu o mea faigata na ui mai ai Siasosi Fosi, o le faafalepuipuiina soo, ma le malaga soo, e le'i faaitiitia ai lona galue. Ua faateteleina lona naunauta'i i le galuega. Ua sauni foi o ia e malaga i Aialani, e fia molimau i le sasao a'e o talitonuga o tagata i lo latou 'apoina lea o le fe'au ma le misiona a le Quakers.

O nisi o Quakers ua taape atu i nisi atunuu e galulue ai faa-misionare. Na tusi i lalo e Fosi i lana 'api tusitusi e faapea: O nisi o Uo (Friends), (o le isi lea ta'u o Kerisiano Quakers) ua musumusuina e le Agaga Paia ina ia salalau atu i isi atunuu e tala'i atu iai le upu moni. I le sa faapea ona tupu talaulau a'e ai ni mafutaga a tagata Quakers i Bar-

bados, West Indies. Sa faapea foi ona matauina se Toe Fuata'iga i Jamaica. Ma salalau atu ai i sasa'e ma oo atu i Malta. O se mea na ofo ai, o le toe fo'i manuia atu o nei misionare e aunoa ma se isi na oti.

O nisi o misionare sa tosina o latou loto i nisi atunuu e fia o e galulue ai. O le mea na latou fai, o le faatalitali lea i le faaali mai o le Agaga o le Atua i le mea e tatau ona latou fai.

O se tasi o uiga sa lauiloa ai tagata Quakers o lo latou nonofo fofilemu ma faatalitali i se faaaliga mai le Atua. Na a'oa'o'ina foi latou ina ia 'auna ne'i faanatinati ona fai o se mea, ae ia faatalitali ma le onosa'i i le tali mai o le Agaga Paia. E talitonu loa i latou ua tali

mai le Atua, ona latou faatalitali loa lea i se avanoa e faataunuu ai. E tatala mai loa le faitotoa, tutu atu loa ma o, tama'ita'i poo alii, tusa lava poo a ni faafitauli o tau tapunipuni maia lo latou o e tala'i atu le upu moni.

O uiga faatuatuaina ia o Kerisiano Quakers, na lauiloa ai i latou o ni tagata faamaoni, amio lelei, ma talitonuina aemaise lava i mea tau pisinisi. Na oo lava ina aveva tagata Quakers ma e e muamua ona filifilia i ni mea tau pisinisi e le 'au faipisinisi o Egelani, ona o lo latou faatuatuaina. Na mafua mai lava nei uiga ona o a'oa'oga a Fosi, ina ia fai ma le faamaoni ma le alofa galuega uma e fai mo soo se tagata.

### O le Faailoga o le Tinoetasi: O le Faaipoipoga

E tele vaega eseese o le talitonuga faa-Quakers sa auai Makerita Fele, ma sa tele foi avanoa e feiloa'i ai Fosi ma Makerita. Na ou ta'ua muamua e faapea e ese le faaloaloa'i o Fosi ma Makerita. O le taimi nei lea ua leai se to'alua o Makerita. Ma sa ta'ua e Fosi i ana tusitusiga e faapea ua leva lava se taimi o iai lona mana'o e fia faaipoipo ma Makerita, ma oo ina ia tuu ai i le Atua ma lona talitonuga, o le a sau se aso "e faataunuuina ai le mea lea ua leva ona ou sailia."

Ou te talitonu o le fiafia o Fosi ma Makerita i le la mafutaga mafana e mafua ona o le alofa moni o le isi i le isi. Ae e tusa ai ma o la talitonuga, na la tuu ai i le Atua le mataupu. Ae oo mai i le vai taimi lea, e tasi lava le paaga tutasi a Fosi, o le faalauteleina lea o talitonuga Faa-Uo, poo le faa-Quakers.

E le taumate lava ua leva ona mate'ia e le isi lagona o le isi. Ae tasi le mea ua mautinoa, o le tausaga e 1669 ina ua faatasi Fosi ma Makerita i Lonetona, na la mautinoa ai, ua tatau ona la *faaauau itulaue e 7*

## “Faamolemole, o Oe o le Atua?”

E le'i umi ona ola le Taua Tele Lonalua a le Lalolagi - 1939-1945. O loo malepe pea Europa, toatele tagata fia'a'ai, leai ni mea e nonofo ai; feoa'i solo ma sa'ili tagata o o latou aiga poo fea o iai.

O loo tumu pea foi Europa i fitafita Amerika.

I se tasi aso, na alu atu ai se fitafita Amerika e aga'i i le mea o tolauapi ai le latou vaega'au, ae tau atu i se tamaitiiti o 'o'omi atu lona isu i le faamalama, ma matamata i le tele o pani ma pai o loo tuu mai i totonu o le fale'aiga. Na o le matamata o le tamaitiiti ma matau gaoioiga a tagata i totonu o le fale'aiga. Tafe foi lona faua pe a vaai atu i tagata o nonofo mai ai ma 'a'ai.

O le taimi lea na ui atu ai le sipi

a se fitafita Amerika i luma o le fale'aiga lea. Na iloa atu e le fitafita le tamaitiiti, ona oso lava lea o lona alofa iai. Ae le'i tu iai a ua alu pea lana taavale. E le'i umi, ae toe liliu mai ma tu i le fale'aiga. Na savali atu i le tamaitiiti ma fesili iai, "E te fia 'ai saniusi?" Na tali le tamaitiiti, "I!" Ae leai sa'u tupe e faatau ai."

Ona savali atu lea o le fitafita ua alu faatau pani, pai, saniusi ma isi mea'ai, ma tuu i totonu o le pepa faatau, ma tuu i le tamaitiiti. Na te'i le tamaitiiti ma faafetai i le fitafita. Na liliu le fitafita o le a alu, ae tago atu le tamaitiiti ua toso mai le ofu o le fitafita ma fesili iai, "Faamolemole, o oe o le Atua?"

"Sir, are you God?"

(George Fox: 1624-1691)

# O SIAOSI FOSI

## O LE NA IA FAASA'OLOTO LE AGAGA

*mai le itulau e 6*

faaipoipo. Ae puupuu lava se taimi na la faatasi ai, ona ua valaauina mai ia Fosi e se mafutaga a Quakers i Yorkshire, e alu atu e fesoasoani i le faatuina o se mafutaga e ta'i masina ma fai. Ona toe tete'a ai foi lea, ae le'i faaipoipo lava, a ua uma ona malie le isi i le isi ua tataua ona la faaipoipo.

O Yorkshire na lagona ai i lona loto, e tataua ona faatutu sa'o i Aialani. Na matua fiafia Fosi i le tali fiafiaina o ia i le aai o Dublin. Na ia faamalo i lo latou faamaoni ma faatuatua i le Atua, ma ia fautuaina ai i latou ina ia latou alolofa i tagata uma ae 'aua le faapito lo latou alofa i nisi, o le a fai lea ma mea e viia ai le Alii i lo latou ola galulue. Na mae'a lona ona malaga loa lea i Egelani se'i feiloai ma le tama'ita'i o le a fai ma ona faletua.

Na feiloa'i loa ma Makerita ona amata tapenapena lea o ia mo le faaipoipoga. Sa ia manatua ni tala fe'avea'i e uiga i le mafana tele o le la faigauo ma Makerita. Sa manatu foi nisi faapea ua leva lava ona faufautane Makerita ia Fosi. Sa masalosalo foi nisi ona o Makerita e mau'oa. O le mea lea e le'i mana'o ai Fosi i talitonuga o tagata e faapea ua ala ona fia faaipoipo ia Makerita ona o le tele o ana tupe. Ma le isi, ona o Makerita e sefulu tausaga e matua ai ia Fosi ma e le toe fanau. O lona mana'o moni lava, ia talitonu tagata o le la faaipoipoga, pe a oo ina faaipoipo, o se faailoga lea o le 'au'au faatasi o Kerisiano Quakers i le latou misiona. Ona o Fosi o le na ia faatuina le 'au Kerisiano

Quakers, o le mea lea e manatu ai o ia, o le mafutaga a Quakers, ma Makerita, e ona ia. Ona ia tusi ai loa lea i aulotu uma a Quakers e faamalamalama iai lona faamoemoe e faaipoipo ma Makerita. Ona femalaga'i ai lea o Fosi ma Makerita mai lea aulotu i lea aulotu e feiloai iai, e pei o la faia i ni o la aiga uma.

Ona faapotopoto ai lea e Fosi o le fanau uma a Makerita, faatasi ai ma o latou ta'ito'alua, ma faanoi iai se'i aumai le latou maliega la te faaipoipo ai ma lo latou tina. Ona oo ai lea i le aso 27 Oketopa 1669, i le fale mafutaga i Bristol, na faataunuu ai ona faaipoipo Fosi ma Makerita. E matua to'atele tagata mai vaega uma o Egelani na auai i le faaipoipoga, ma sainia ai le pepa faaipoipo e ni tagata toetoe atoa le to'a selau latou te faamaonia le faatasiga i le faaipoipoga. O le taimi lea ua 45 tausaga le matua o Fosi, ae 55 tausaga le matua o Makerita. E le'i uma ane ona faaipoipo ae toe mavae foi ona ua alu Fosi e faasolo ana laugaga i isi itu o le atunuu, ae fo'i Makerita i Suasamua e fesoasoani i Uo Quakers i le itu i matua o le atunuu.

Na faapea lava ona felagolagoma'i ma aafia i la'ua ia la galuega i tausaga e luasefulu na sosoo ai, ma la'itiiti ai lava ni taimi e mafuta ai. Ona na la faamuamua le la misiona mai le Atua.

### Folau i le Vasa mo le West Indies ma Jamaica

Ua leva lava ona mana'o Fosi e asiasi i Uo Quakers i le West Indies. Peitai ona o lea faato'a toe faafalepuipuiina foi Makerita ona

o le misiona, o lea na tele ai taimi o Fosi na alu i lona taumafai e faasa'oloto Makerita mai le falepuipui.

Na aumai loa le faaaliga manino mai le Atua ina ia asiasi i le West Indies, o le taimi foi lea na tatala ai i tua Makerita. O nai aso na sosoo ai a o le'i folau le vaa, na maua ai se avanoa o Makerita e alu ai i Lonetona e faatasi ma Fosi a o le'i folau mo le West Indies. Na faanoanoa lava le faamavaega a le ulugalii, ona o ia aso, a malaga se isi i isi atunuu, e fesiligia lava le toe feiloa'i pe alu ma oti ai lava.

O Elisapeta Huteni, le uluai tagata na liliu i tala'iga faa-Quakers, ma isi na latou malaga faatasi ma Fosi. E lua masina le umi o le faiga malaga. E leai ni mea na tutupu i le malaga vagana ai se mea na tula'i mai i lona tolu o vaiaso talu ona alu le vaa.

O se tasi aso na latou vaaia ai se manua o se isi malo o aga'i atu ia latou ma e saosaoa lava lana alu atu. Na latou mautinoa e tafanaina lo latou vaa pe a latalata atu. Na alu atu le kapeteni o le latou vaa ia Fosi pe o le a se mea a fai. Ae tali atu Fosi e le o ia o se tagata folau. A o le a le mea e manatu iai le kapeteni? E lua mea e mafai ona fai: o le taumafai e sola ese lo latou vaa, ma le isi, folau pea ma faamoemoe o le a lelei mea uma. Na tali Fosi, o se mea valea le taumafai e sola ese ona e matua saosaoa lava le manua. Ua popole lava le kapeteni. Ona fai atu lea o Fosi, o le mea lea o le tofotofoga lava lea o lona faatuatua, ma o le mea lea e tataua ai ona faatalitali i le Alii ma lona fesoasoani mai. Ona faatalitali ai lea o Fosi mo se tali mai le Alii. E le'i umi ae faali e le Alii, o lona mana o le a tu i le va o lo latou vaa ma le manua. O le mea lea, uli sa'o pea le vaa i lona alavaa fuafuaina.

Mulimuli ane ona tusia ai lea e Fosi i lana tusi e faapea:

*faaauau itulau e 8*

# O Le Tāua o Soo Nei: Anetere'a, Peteru, Ioane ma Paulo

saunia e

**Faatafa Nefu FS, EFKS Alamagoto**

**Mafutaga Faifeau A'oa'o ma Faletua, Matagaluega Apia**

## 1. Faatomuaga

O le faamoemoe o le pepa, e faamatala nisi o soo, poo aposetolo mai le Feagaiga Fou e pei ona ta'ua. E faataua ai pea le manatu ua faa-autu iai lenei vaiaso i le Tusi Faitau Aso a le Ekalesia. O lea manatu, o se fesili e faapea: **'O le a se taua o le igoa?'**

Ou te fia faatauaina igoa o soo poo aposetolo ua taua i itu nei. O le taua poo le uiga o o latou igoa, ma le tulaga na iloa ai lo latou faatinoina o le galuega faasoo ma le faa-aposetolo ua ta'uta'ua ai o latou igoa.

*Ua faaaogaina faatasi le upu soo ma le aposetolo i lenei pepa ona o mafuaaga nei: Muamua: O le soo e pei ona faaaogaina ai i tusi a fai Evagelia o le faa-Samoaina lea o le upu Eleni - 'mafetes', o lona uiga o le tagata faalogo, vaai, ma talitonu i mea ua a'oa'oina ai. O se upu na faaigoa ai le to'a sefululua filifilia e Iesu e*

*fesoasoani i le talaiina o le Malo o le Atua. Peitai, ina ua afio a'e Iesu i le lagi, na faaaogaina lava le upu soo e ta'u ai ua le na o i latou e sefululua na filifilia, ae soo se isi lava ua mulimuli, talitonu, ma faatino a'oa'oga o le TalaLelei ia Iesu Keriso. Lua - O le upu aposetolo o lona uiga, 'o le ua auina atu.' O se upu na faaaogaina e ta'ita'i o le uluai Ekalesia e faaigoa ai latou na faatinoina le galuega o le tala'i. E aofia ai soo na filifilia e Iesu ma latou na auina atu faapitoa i le galuega, e pei o Paulo. E faaaogaina faatasi le upu soo poo le aposetolo e ta'u ai latou ia, o e ua filifilia e faaautu iai lenei su'esu'ega.*

## 2. Soo ma o latou Faamatalaga:

2.1 - Aneterea: O le uiga o le igoa Aneterea, o le malosi faa-tamatane (manly). O Aneterea o lona tama Iona (Ioane 1:35-42), o le uso o Peteru. O molimau a

Mareko, Mataio, ma Ioane o loo ta'ua ai Aneterea o se tasi o ulua'i soo na valaauina e Iesu. O Petesaita lona nuu, ae na galue ma aumau i Kapanaumi. I le tala a le fai evagelia o Ioane, o Aneterea o le soo o Ioane le Papatiso. Ae ina ua faalogo o molimau Ioane fai mai: "O Iesu o le Tama'i Mamoe a le Atua," ona mulimuli ai lea ia Iesu. O Aneterea na faailoa i lona uso o Peteru Iesu, "Ua ma maua le Mesia" (Ioane 1:41. O nisi ia o uiga taua o lenei soo, e pei ona atagia i molimau a Ioane.

Ioane 1:41 - Ua ia ulua'i maua lona lava uso o Simona, ona fai atu lea ia te ia, "Ua ma maua le Mesia."

Ioane 6:8&9 - Ona fai mai lea ia te ia o le tasi o ona soo, o Aneterea le uso o Simona Peteru, "O loo i'inei le tama o ia te ia areto karite e lima, ma nai i'a iti e lua lau; ae auma ea ia mea ia i latou e toatele?"

O loo atagia i nei mau le ituaiga soo e iai Aneterea, o se soo e fiafia e ave tagata ia Iesu. E loto atu ia Iesu ma lana galuega ma fesoasoani iai. Ta'ua i le mau muamua (Ioane 1:41), o Aneterea na ave lona uso o Peteru ia Iesu. Na amata lana galuega faasoo i le ave o lona uso, faasolo atu i lona aiga ma isi tagata. E pei ona iloa i le mau lona lua (Ioane 6:8-9), o le faailoa atu lea e Aneterea o le tamaitiiti sa iai lana mea'ai ia Iesu. O lona aveina atu o lea tamaitiiti ia Iesu, o lona aveina atu lava lea o tagata uma sa iai, e ala i lo latou aai faatasi o mea'ai a lenei tamaitiiti.

O Aneterea la o se soo talavou na faaoga tataua le ola ma le malosi e le gata i le tausia o aiga, a ua faaauau itulau e 14

# O SIAOSI FOSI

## O LE NA IA FAASA'OLOTO LE AGAGA

*mai le itulau e 7*

Ua lata atu lava le manua o ae valaau atu le tiute e logo atu toetoe lava a oo atu le manua. O le taimi lea ua folofolo tetele faua o le pasese, ae ou alu i lo'u potu ma ou vaavaai atu i le faamalama, e le'i goto lelei le masina i le taimi lea, a ua toetoe lava taunuu le manua. Na ou tu atu i luga o le a ou savali i fafo ma lo'u potu ae ou manatua le afioga a le Atua, o lona

mana o loo tu i le va o lo latou vaa ma le manua. Ona ou toe ta'oto ai lea i lo'u moega. Na taunuu atu le kapeteni ma nisi o seila ma fesili atu pe a pe a uli ese le vaa ma le alavaa lea e alu ai. Na ou tali e faitalia latou. A ua goto le masina i le taimi lea, a ua agi mai se matagi malosi ma faigata ai ona iloa mai matou e le manua. Ona matou folau ai lea ma matou le toe iloa atu latou.

## 8. O LE SULU SAMOA Aperila 2017



# O le Mafuaaga o le Pese: Rescue the Perishing

Isaia 61:1: Ua i o'u luga le Agaga o le Alii le Atua; aua ua faauuina a'u e le Alii e tala'i le tala lelei i e ua tigaina, ua ia auina mai a'u e fufusi i e loto momomo, e tala'i le sa'olotoga i le tafeaga, ma le matua tatalaina o e ua fusifusia.

O se tasi o upu o le tatou gagana e matua faanoanoa ai o le upu "faafanoga" - perishing. Ae o se upu sa faaaogaina soo e Iesu i ana saunoaga, e faamatala ai tagata ua faatagataeseina faale-agaga mai le Atua.

Ua faamatalaina e le tama'ita'i o Fanny J. Crosby, le tama'ita'i sa ta'ua o le "tupu tama'ita'i o pese faale - tala lelei", le mafuaaga na ia tusia ai le pese leni - 'Rescue The Perishing'.

Fai mai a ia, "Ou te manatua lo'u tusiga o le pese leni i le tausaga e 1869. E pei lava foi o isi pese e tele na ou tusia, na mafua ona o se mea na oo ia te a'u i le nofoaga o le misiona i le aai o Niu Ioka. E masani lava ona ou taumafai ina ia ou alu i le misiona faatasi i le vaiaso ou te talatalanoa i "si a'u fanau tama". Sa fai sa'u tautalaga i se faatasiga tele o ni tamaloloa faigaluega i se afiafi vevela o le taumafanafana, ae 'eli'eli mai lava se manatu i lo'u mafaufau ma fai mai e tataua lava ona faasaoina se tama a se fafine i lea po a o le'i pa'u atu i le malaia e faavavau. Ona ou talosaga ai lea faapea, afai lava o iai se tama o faatasi mai ua eseese ma lona tina ma ua alu ese ai mai lona

'aiga ma lona tina ma ana a'oa'oga, a uma le sauniga, ona sau lea ma te feiloa'i.

E uma le sauniga ae savali atu le tama e 18 ona tausaga.

"Faamolemole tama'ita'i poo a'u lea na faatatau iai lau faamatalaga?" O le fesili lea a le 18 tausaga le matua. "E te iloa, na ou fai i lo'u tina ma te feiloa'i i le lagi, ae ona o lea ou te ola i le lalolagi, e le mafai ona

taunuu lea faamoemoe."

Na matou tatalo mo le tama. Ina ua uma talosaga ae tu a'e i luga ma ona foliga fiafia ma fai mai, "O lea la ua ou sauni e ma te feiloa'i ma lo'u tina i le lagi, aua o lea ua ou maua le Atua."

E le'i oo i le aso lea na faaolaina ai le tama lea, ae auina atu e Viliamu Toone le musika mo le pese leni a Fanny - 'Rescue the Perishing'. Na faavaeina lea pese i luga o le fuaiupu: "Ua fai atu le alii i le auauna, ina alu atu ia i alatetele ma magaala, ma ia pulunaunau atu i latou e o mai, ina ia tumu lo'u nei fale." - (Luka 14:23)

## Rescue the Perishing

Rescue the perishing, care for the dying,  
snatch them in pity from sin and the grave;  
weep o'er the erring one, lift up the fallen,  
tell them of Jesus, the mighty to save.

Down in the human heart, crushed by the tempter,  
feelings lie buried that grace can restore;  
touched by a loving heart, wakened by kindness,  
chords that are broken will vibrate once more.

Rescue the perishing, duty demands it-  
strenght for thy labour the Lord will provide;  
back to the narrow way patiently win them, tell the  
poor wand'rer a Saviour has died.

*Chorus:* Rescue the perishing, care for the dying;  
Jesus is merciful, Jesus will save.

---

### **PRAYER:**

*Prayer is not a substitute for work, thinking, watching, suffering, or giving; prayer is a support for all other efforts.*

*George Buttrick)*

*A Page for Youth*  
**ITULAU MO TUPULAGA  
TALAVOU**

---

# Heart Attack!

## Ua Pe le Fatu!

*mai le itulau muamua*

E iai lava se mea o faaletonu! Ua ou fia 'e'e. Ae pei o tapuni lo'u gutu e se tagata.

Ua tete lo'u tino ma ua ou fia faasuati. Ae fai mai le teine tausima'i, "Aua e te popole! O le faaga'au lena ua momono atu i lou gutu e alu atu ai se 'ea. Na pe lou fatu ona matou momonoina lea o le faaga'au e ala atu i lou fa'a'i ina ia mafai ai ona e manava."

O le a le mea na tupu? Na ou vaavaai solo ma tau atu la'u vaai i teine tausima'i e to'a ono o loo pisi solo i tafatafa o lo'u moega. O moli o le potu ua 'ese lava le malosi o lo latou malamalama, a o o'u taumafai e manatua mea na tutupu i itula ia faato'a te'a atu.

O le afiafi na fai ai le matou mea'ai ma lo'u to'alua o Dave, ma le ma tama tama o Dan e sefulu ma le lua ona tausaga. O le ma tama teine o Repeka o loo i le togalauapi (camp) mo le vaiaso atoa.

Na uma le mea'ai ona matou o lea i le faamanatuina o le 40 tausaga o se isi o a ma uo. Na uma lea ona ou alu lea, i lea lava afiafi, i se fonolea le 'au ti'eti'e uila i luga o mauga (mountain biking). O le mountain biking o se mea ou te matua fiafia lava i ai. Ou te iloa e to'a laitiiti lava ni fafine ua silia i le 40 o latou tausaga e fiafia i lea taaloga, aua ua matutua, ua ta'i 40 tausaga e pei foi o au. Ae ese lo'u

fiafia iai. Ou te taunuu atu ua matua tumu lava le fonolea, ona ou tu lea i le pito lava i tua ma ou faalogologo atu ai.

Na o le lua ni minute talu ona ou taunuu ae amata ona ou faalogoina o'u tino, e pei e iai se mea o faaletonu. E pei ua malo lo'u fatafata, ua gaioi o'u ogalima, ma ua faigata ona ou manava. E le tiga tele, ae na ou lagona lava e iai se mea ua faaletonu.

Pei lava e fai mai se isi e tatau ona ou fo'i i lo'u aiga, ma oo ina ou fai ai se mea valea - o lo'u aveina lea o le taavale. Na o le lua maila le mamao o lo matou fale, ae pei e fia selau maila le mamao ona o o'u mafatiaga. A o alu la'u taavale, ae vevesi lo'u mafafafau, pe ou te oo 'ea pe leai.

Na ou taunuu loa i lo matou fale, faa'e'e le pu o le taavale, ma ou tagi ina ua ou iloa atu Dave ma Dan.

"Ua ou faaletonu! Ua ou ma'i! Ua le lelei la'u manava. Ma ua tiga ma gaioi o'u lima ma lo'u fatafata." O la'u tagi lea a o vevesi mai lo matou aiga.

Na ou iloa lelei atu lava le faaletonu o foliga o si o'u aiga a o oso Dave i le taavale ma matou o loa i le falema'i. A o alu le matou taavale, ae na o le faatautau i fafo o lo'u ulu i lo'u fia faasuati ma fia maua o se 'ea.

Na taunuu atu i le falema'i ona faata'oto lea o au i le moega

taavale ma tulei ai a'u i totonu o le fale. E le'i toe faatali foma'i ma tausima'i - i le fetosoa'i o a latou faaga'au ma uaea i luga o lo'u tino. Fai mai le isi foma'i, "Pei lava e le o lou fatu. Ae se'i su'e pe o le a le mea ua tupu."

Ua tau oo mai le masiasi ia te a'u ona o lo'u popole i lo'u fatu ae o lea ua fai mai "Pei lava e le o lou fatu!" E faapea nei foma'i o lo'u matanana ma lo'u pala'ai.

Ua tumu nei foma'i ma teine tausima'i i lo'u potu - tui lo'u toto, sa'ili le tata o lo'u fatu, ma isi mau mea ua fai. Na o lo'u ta'oto'oto ma ou faatalitali ma tatalo, afai o iai se mea o faaletonu, talosia ia vave ona latou maua. A o sauni le isi foma'i e su'e le okesene ma lo'u toto, ae ou vaai atu e pei e opeopea mai i o'u luma le foma'i. Na ou tau manava a'e, ma ou fai atu, "Niniva lo'u ulu!" A o le taimi foi lea na ou le toe iloa ai se mea.

Na ou ala a'e ina ua popo lo'u lima e le tausima'i ma fai mai, "E 45 sekone na pe ai lou fatu, ona matou faaaogaina ai lea le masini eletise e faate'i ai lou fatu. O lea o le a taofia oe i le falema'i se'i faaaauu su'esu'ega. Ua laki le aumai o oe e lou to'alua i le falema'i. A na pe lou fatu o e i le tou fale, e le taumate lava le oo mai i le taimi lena ua uma lou ola."

Na toe tata tetele lo'u fatu i le faamatalaga a le teine tausima'i, ae na ou manatua i le taimi lea e aafia isi o lo'u aiga i le ma'ifatu. O le mea lena sa ou faaeteete ai i a'u mea'ai, ma ou malosi ai i le koloni e pei o lo'u to'aga i le ti'eti'e uila i luga o mauga. Ma o o'u faalogona i o'u tino i aso uma, ou te malosi lava, ma e ou te le ma'ima'ia e pei o isi fafine e ta'i 40 tausaga le matutua pei o a'u.

I aso na taofia ai a'u i le falema'i na faamatalatala ai e foma'i le mea na tupu i lo'u fatu, o se mea e le taatele ona tupu i tagata, ma e latou te le'i maua le mafuaaga na tupu ai. O a latou su'esu'ega uma na *faaaauu itulau e sosoo ai*

*A Page for Youth*  
**ITULAU MO TUPULAGA  
TALAVOU**

---

# Heart Attack!

## Ua Pe le Fatu!

*mai le itulau muamua*

faamaonia ai o loo malosi lelei uma lo'u tino, e leai foi ni poloka i o'u alatoto. "O ou alatoto e matua mama lava. E sea sea ona matou vaaia ni alatoto e faapea ona mama." O le tala lea a foma'i. Ona ou te'a ai lea i tua i lo matou aiga ina ua te'a aso e ono i le falema'i.

O le a la le uiga o leni mea na tupu ia te a'u? O le a le mea na faaavanoa ai e le Atua lea mea e tupu ia te a'u?

A ou toe tepa nei i tua i tausaga ia e fa ua te'a, ona ou maua ai lea o ni lesona mai le Atua. Ina o le a ou fo'i i lo'u aiga mai le falema'i, ae faatonuina a'u e le foma'i ina ia ou faaeteete ma tuu nisi mea o popona iai lo'u loto ma ou soona vevesi ai. E le se mea faigofie lea ia te a'u. Ua ou masani i le ola to'aga ma auai i le tele o mea ou te fiafia iai, e pei o ti'eti'ega uila i mauga. Ae ua a'oa'o mai le Atua, o lo'u auai i le tele o mea e pei ona

iai nei lo'u olaga, e le tau faamaonia ai le alofa o le Atua mo a'u. E alofa mai lava le Atua ia ona o le tagata o a'u. O lona alofa tele foi lea na faasaoina mai ai a'u mai le oti i le pe o lo'u fatu mo le 45 sekone, a ua ou i le falema'i ma ua faalalava solo faaga'au i lo'u tino ina ua amata togafiti a foma'i. A na pe lo'u fatu a o ave la'u taavale.....!

Ina ua te'a lea vai taimi o lo'u ma'i, ona faamanatu mai lea e le Atua ia te a'u le Salamo e 116 f.8,9,12: E le taumate o le tali tonu lea o le fesili - Aisea?

"Aua ua e lavea'i mai ia te au nai le oti, o o'u mata ne'i tagi, ma o'u vae ne'i pa'u. Ou te savali i luma o le Alii i nuu o tagata ola. Na ou faatuatua, o le mea lea na ou tautala atu ai; o a'u nei sa matua tigaina a'u.....Se a se mea ou te tau'i a'i atu i le Alii ona o lona agalelei mai uma lava ia te a'u?"

tusia e Karin Lindholtz Fite  
faamatalaina e  
Afemata T. Apelu Aiavao

---

# Galuega Lavea'i Faale-Tala Lelei

*mai le itulau muamua*

O ia lava na na aveina o tatou vaivai, ma na tauave o tatou ma'i (Mataio 8:17)

### Uiga o le Upu: Galuega Lavea'i

O le upu "galuega lavea'i" e uiga tutusa lava ma le upu "galuega faaola": ma o se upu e lautele. O lona uiga, e uiga eseese lona faatinoga aua e eseese ituaiga faafitauli e afaina ai le soifua o le tagata ma manaomia ai se fesoasoani.

Mo se faata'ita'iga, a malemo se tasi i le sami, o le galuega lavea'i o le mauu o se isi tagata e faaola mai.

A matelaina se tagata i le fia'ai ma fiainu, o le galuega lavea'i le ofoina iai o se mea'ai poo se meanu.

A mu se fale a o saisaitia ai se tasi i totonu, o le galuega lavea'i o le oso o le tagata i totonu o le fale e sefe mai poo le fui o le mu.

A tigaina le gasegase o se tagata, o le galuega lavea'i le aami o se fofo e togafiti ai.

A ulufia se tagata e se temoni, o le galuega lavea'i le tuli i fafo o le temoni.

A mafatia foi se tagata i faafitauli faale-faigauo ma faale-ulugalii, ma fuafua ai e fai se faaiuga le lelei e pei o le pule i le ola, o le galuega lavea'i, le talatalanoa ma apoapo'a i iai o sana uo poo se

faifeau, ina ia faanofo filemu ai lona mafaufau.

E oo lava foi i tagata ua faanoanoa ona o le maliga a le maliu ma le oti, o le galuega lavea'i le faamafanafana iai o isi tagata ina ia tafiese le ao pogisa.

O nisi na o uiga ma faatinoga o le upu "galuega lavea'i, peitai e tasi lava lona auga, o le faasaoina o se tagata mai se tulaga faigata ma mafatia, o loo iai e ono afaina ai lona soifua.

### Galuega Lavea'i i le Tusi Paia

I le molimau a le Feagaiga Tuai, o galuega lavea'i o loo faaautu lava i le faasaoina e le Atua o lona nuu ma ona tagaa mai mea e fano ai.

Na lavea'i e le Atua lona nuu o Isaraelu mai i taua ma o latou fili (ft. O le taua ma Amaleka lea na sisii ai lima o Mose - (Esoto 17:8-15). Na lavea'i mai mala, o oge ma faama'i (Elisaia ma le fafine

*faaauau itulau e 12*

# Galuega Lavea'i Faale-Tala Lelei

Sunema - 2 Tupu 8: 1-2). A o le lavea'iga tele ma le logologoa ua fai ma faamanatu tumau i le nuu o Isaraelu e oo mai i aso nei, o le faasa'olotoga mai i le pologa i lima ma pulega sau a Farao ma Aikupito. (Esoto)

I le Feagaiga Fou, e tele ma anoanoa'i galuega lavea'i na faia e lo tatou Alii Faaola o Iesu. E le gata o le faamaloloina o ma'i, (Mataio 4:23 - Ua faataamilo Iesu i Kalilaia uma, ua ia a'oa'o i o latou sunako, ua ia tala'i atu foi le Tala Lelei o le malo, ma faamalolo e ia o ma'i uma ma ma'i tiga uma o le nuu). O le tutuliina o temoni (Mataio 12:22), o le faatuina o tagata maliliu mai le tuugamau (Ioane 11: 1-44 - faatuina o Lasalo), o le fafagaina o tagata fia aai (Ioane 6: 10 - fafagaina o le 5000), ma le tele o isi galuega faaola.

Ina ua mavae atu Iesu ae faaauau e le ausoo ma aposetolo le galuega tala'i, na faaauau ai foi ma galuega lavea'i (aua o faailoga ia o le taunuu mai o le malo o le Atua). O le tele o nei galuega faaola a le au aposetolo lea o loo faamauiina i le tusi o Galuega, ma o se vaega o na galuega faaola o loo lisiina atu i lalo.

Galuega 3: 1-11 (Faamaloloina e Ioane ma Peteru o le pipili)

Galuega 8:7 (Tutuliina e Filipino o temoni.)

Galuega 9:36 - 43 (Faatuina e Peteru ia Tapita mai le oti)

Galuega 16: 16-18 (tuli e Paulo le temoni mai le auauna tamaitai)

Galuega 28: 9-10 (Faamalolo e Paulo ma'i uma i Malaita)

## Aotelega o Manatu

O galuega lavea'i uma, o galuega

tatau ma galuega lelei, aua o galuega mo le manuia o tagata. O le mea moni, e leai lava se tagata soifua e le moomia se galuega lavea'i aua e oo uma tagata i ma'i ma puapuaga o lenei olaga. Ua silafia lelei e le Alii o Iesu le sa'o o lena mea ma ou te manatu o le uiga foi lena o upu nei o lana lauga i luga o le mauga e pei ona faamauiina e Mataio: 7:12.

O lona uiga, afai e tatou te puapuagatia ma manaomia se fesoasoani mai isi tagata, e manaomia foi e isi tagata le fesoasoani mai ia i tatou. Ma o le mea lea e tatau ai ona fe'oe'oea'i ma fetufaa'i tagata uma ua talitonu ia Iesu i le faatinoga o galuega lavea'i mo le manuia o tagata uma. O le mea foi e ao ona silafia e tagata uma, o galuega lavea'i uma tatou te faia i tagata puapuagatia, o galuega uma na ua faia mo le Atua e pei ona faapupula mai e Iesu i le ata faatusa lenei o le aso o le faamasinoga pe a toe afio mai le Alii. (Mataio 25:34-40).

Ua manino lelei mai le ata o le aso o le faamasinoga o loo i luga le taua o le faatino o galuega lavea'i mo tagata o loo moomia le fesoasoani. Ua manino mai ai foi le feau ma le finagalo o le Alii ina ia faatino e soo uma ma le au faatuatua nei galuega lavea'i. Ua manino mai ai foi le tau o tagata e faia nei galuega lavea'i, o le faamanuiaina e le Atua, e nonofo foi i le itu taumatau o le Alii, ma fai mo latou tofi le malo faavavau (fuaiupu e 34). A o le mea foi e ao ona silafia uma e tagata faatuatua, o le manuia e maua i le faatino ae le na o le iloa o le mea e tatau ona fai. O le uiga lena o le tuualalo a Iakopo mo tagata faatuatua uma e pei ona taua i le fuaiupu lenei:

(Iakopo1:22)

O le tagata faatuatua moni, o le tagata e faitau i le Tusi Paia ma malamalama ma faatino poloa'iga a le Alii. Aua o le faatuatua e fua mai ai galuega lelei. O le agaga tonu lava foi lena o isi upu a Iakopo e pei ona iai i le palakalafa lenei: (Iakopo 2:14-17).

O le tuualalo a Iakopo i le taua o galuega lavea'i ma galuega lelei, aua o fua faaaliali lena o le faatuatua. O galuega lelei e mafua ona faia ona o le Alii, ae le ona o le tagata. O galuega lavea'i faale-Tala Lelei na, o galuega e puna mai ona o le iloa o nafa ma matafaioi faa-soo mo le viiga o le Atua. O galuega lelei na e fiafia iai Iesu ma ta'uleleia ai tatou ma faatumauiina ai lo tatou tulaga faa-soo e pei o lana fetalaiga lenei o loo faamauiina e Ioane: *E viia lo'u Tama i lenei mea, pe a outou fua tele mai; ona fai ai lea o outou mo'u soo.* (Ioane 15:8)

O galuega lavea'i faale-Tala Lelei, o galuega lavea'i e fai ona o le viiga o le Atua. Peitai o galuega lavea'i e le faale-Tala Lelei, e fai ona o viiga o tagata ma ituaiga lotu ma maua ai o latou tau faale-lalolagi. O le ituaiga galuega laveai lena o loo lapata'i atu ai Paulo i lana tusi i le Ekalesia i Efeso e faapea: (Efeso 4:14).

O le apoapoa'iga i le tele o filosofia ma talitonuga tau faasese e foliga mai e aia mealelei ona o le Atua, ae ese le faamamafa o iai., O galuega lavea'i na e tatau ona tatou faateete iai aua o si o tatou atunuu lea ua fesouaina i talitonuga eseese mai fafo ua tau pispisia ai le faatuatua moni i le Atua soifua.

## Upu Faaiu

O galuega lavea'i uma e pei ona talanoaina i luga, o galuega lavea'i faale-tino, e faasaoina ai le tagata mai le oti. Peitai, e leai se tagata e ola pea e faavavau. O le tino, e oo lava i le pala. Peitai o le galuega lavea'i pito sili ona taua, o le galuega lavea'i e *faaauau itulau e sosoo ai*

# O Le Taua o Soo Nei: Anetere'a, Peteru, Ioane ma Paulo

*mai le itulau e 8*

faapena foi i le tautuaina o le galuega a le Atua. O se faata'ita'iga lelei lea mo latou uma o e fia avea ma soo o Iesu.

## 2.2. Peteru

O Peteru o lona igoa muamua o Simona, o se igoa Eperu o lona uiga 'ua faafogaina e le Atua' (God has heard). E tusa ai ma le molimau a Ioane, o Simona na faaigoa e Iesu ia Peteru. (Ioane 1:42). Ua ia aumaia foi o ia ia Iesu ua silasila atu Iesu ia te ia, ona fetalai atu lea, "O Simona oe, o le atalii o Iona, o le a igoa oe ia Kefa," o lona uiga o Peteru. O le igoa Peteru e pei ona taua, o lona uiga o le papa. O le papa (petros) o le upu Eleni (Greek), a o le upu Defa (Cephas), o le upu Aramaika (Aramaic) lea o le papa.

O Peteru o le Petesaita ae nofo i Kapanaumi, o le atalii o Iona, a o le uso o Aneterea. O Peteru o se tasi o soo iloga i le mafutaga a Iesu ma ona soo. Fai mai e osovale, o lona osovale lea, e mafua ai ona fetaia'i ma faafitauloi. O se tasi lenei o soo e auau iai Iesu aua e ui lava i ona vaivaiga, ae sa tele lava sona sao i le galuega a Iesu.

O Simona Peteru la e pei ona lauiloa ai i le Feagaiga Fou, sa fai

ma fofoga o le ausoo, aua e tele lava ina muamua tali ia Iesu. E manatu nisi o le au su'esu'e o le Tusi Paia, o Peteru e iai i le li'o o soo e sili ona latalata ia Iesu. O latou ia ma Iakopo faatasi ai ma Ioane na molimauina le "liua ai o Iesu" i luga o le mauga (Mataio 17:1-9). O latou foi ia na molimauina tiga sa feagai ma Iesu i le togalaau i Ketesemane (Mareko 14:33-42).

I le Penetekoso (Galuega 2:1-21), na faatutumuina ai le au aposetolo i le Agaga Paia na aofia ai ma Peteru lea na lauga i tagata sa auai i lea aso. Fai mai le molimau a le tusi o Galuega, e 3000 tagata na talia Iesu i lea aso.

O le amataga lea o le galuega a Peteru ina ua afio a'e Iesu i le lagi. Sa muamua ona aga'i i tagata Iutaia. Peitai, ina ua iloa le faaaliga i Iopa (Galuega 10:1-48), o se 'ie tele na iai ituaiga o manu eseese. O ina na iloa ai e Peteru le fe'au, "*O mea ua faamamaina e le Atua, aua e te ta'ua e sa.*" Ona papatisoina ai lea e Peteru le ta'ita'i o le to'aselau, o le tagata Roma e igoa Konelio ma lona aiga. Ma mautinoa ai e Peteru, o le Tala Lelei e mo tagata uma.

I faamaumauga o talafaasolopito o le Ekalesia, o le sauaina o tagata

Kerisiano i Ierusalem na mafua ai ona alu Peteru i Roma e tala'i ai le Tala Lelei o le Faaolataga. O le aai o Roma na fasia ai ma faasatauroina ai. Fai mai le tala, na talosaga Peteru i le taimi o lona faasalaga, "Poo ai o ia o le a faasatauro ai e pei o lona Alii, a ia faasatauro e u i luga ona vae (se'i tulou), ae u i lalo lona ulu."

O nisi o itu taua ua lauiloa ai Peteru o loo molimau ai Mataio, na savali i luga o le vai (Mataio 14:28-33). Na iloa ma ta'utino e Peteru o Iesu o le Mesia, e le o ia a o le Agaga o le Atua na faailoa ia te ia (Mataio 16:16). O Peteru foi na tusia tusi nei, o le 1 Peteru ma le 2 Peteru.

O nisi nei o vaivaiga na iloa ai Peteru i le mafutaga ma Iesu, o le pala'ai lea, o se tagata e le mautonu foi lona mafaufau i le tele o taimi. Faata'ita'iga, na iloa i lona faafitia o Iesu ma alu ese ai. A o Peteru lava ia o se soo faamaoni (loyal and committed disciple). E le'i toe fefe lenei soo ina ua mausali le faatuatua e pei o le papa, ua loto tele e tala'i le Tala Lelei o a lava fita ma faigata na oo iai.

## 2.3. Ioane

O Ioane e tulaga ese foi lona avea ma soo. O le uiga o lona igoa i le gagana Eperu, "o le ua alofaina e le Atua." O loo atagia lea tulaga i lo la va feagai ai ma Iesu i le galuega. O loo ta'ua ai Ioane o se soo ua alofaina e Iesu, poo se soo e le gata e sili ona latalata ia Iesu, ae e sili foi ona latalata iai Iesu. O Ioane na tusia tusi nei e lima o le Feagaiga Fou: O le Evagelia a Ioane, 1 Ioane, 2 Ioane, 3 Ioane, ma le tusi o Faaaliga.

E faapea nisi o molimau a le au su'esu'e o le uluai lua senituri, (1st and 2nd centuries), ina ua alu ese Ioane ma Ierusalem, ua alu ma nofo i Efeso, (Asia Itiiti), le vai taimi lea o le taua a Iutaia (Jewish war) i le 66-70AD. Ma o Efeso na faaaau ai le galuega tala'i a Ioane.

*silasila iulau e 14*

---

## Galuega Lavea'i Faale-Tala Lelei

faasao ai le agaga. O le galuega lavea'i e le taua ai poo le a le ituaiga tino o iai; pe pipili, pe tauaso, pe gugu. A o le galuega e faamamafa i le agaga ina ia talia le ituaiga tagata ua iai ma iloa ona 'ana'ana i le Atua. O le galuega lavea'i e a'oa'oina ai le tagata i mataupu tau le Atua, ia iloa le agasala ma taumafai e aloalo ese ai, ma ia iloa le taua o le faaolataga na saunia e Iesu

Keriso e ala i lona malii ma lona toetu, le faaolataga e maua pe a tatou faatuatua ma salamo. A o nei galuega lavea'i uma, e le mafai ona manuia pe afai e faalagolago tasi i so tatou iloa. Ae mafai ona faatino ma manuia pe afai e faamoemoe i le Alii, aua fai mai le molimau a Mataio: "*O ia lava na na aveina o tatou vaivai, ma na tauave o tatou ma'i*" (Mataio 8:17). Amene.

# O Le Taua o Soo Nei: Anetere'a, Peteru, Ioane ma Paulo

*mai le itulau e 8*

Pau lea o le soo e le'i faasalaina i le oti e pei o isi soo, na maliu filemu i Efeso ina ua matua lona soifua.

O Ioane e sau mai Kapanामी, o lona tama Sepetaio (Mataio 10:35) ma lona tina o Salome (Mataio 27:56) O lona uso Iakopo le soo o Iesu, o faifaiva i le taimi na valaauina ai e Iesu. O Ioane ma Iakopo, o ni soo e pei o Peteru ma Aneterea, o ni au uso sa taulamua i le galuega tala'i a Iesu. O Ioane o se tasi lea o soo na molimauina le liliueseina ai o Iesu i luga o le mauga, ma lana tatalo i Ketesemane.

E iai taimi i le galuega na le taliaina ai Iesu e tagata Samaria (Luka 9:51-56), ona fesili lea o Ioane ma Iakopo, pe le valaau i se afi mai le lagi e faaumatia ai tagata Samaria, ae faliu Iesu ma a'oa'i la'ua. E manatu le au su'esu'e o uiga ia o lenei au uso na mafua ai ona faaigoa e Iesu o 'Poaneki', o lona uiga 'o tagaga faititili', (Maeko 3:17). O uiga faa-faititili lava ia o lenei au uso na atagia ai ni o la vaivaiga faale-tagata, o le le loto faamagalalo.

Ae na molimauina pea e Ioane le alofa le faatua'oia o Iesu i la latou mafutaga. O le mea lea ina ua osofia le au soo i Ierusalem e le Agaga o le Atua, ua pulupulu lima faatasi Ioane ma Peteru i le galuega a le Atua. Ua leai se toe masalosalo, ua leai foi se mea e fefefe ai e tala'i ma folafola atu le Tala Lelei i Ierusalem, e ui lava i le tele o sauaga sa feagai ma i la'ua.

## 2.4. Paulo

Na fanau Paulo o ni tagata Iutaia ona matua, e tusa ai i tu ma aga faa-Iutaia na peritome i le vaiaso muamua talu ona fanau mai

(Filipi 3:5). E lua igoa o le aposetolo: o Saulo le igoa Eperu, ma Paulo le igoa Eleni. O le uiga o le igoa Saulo i le gagana Eperu, o le 'tatalo poo le faatoga atu.' A o le igoa Paulo i le faa-Eleni, o le 'faatauvaa'. E iai nisi e manatu o le mafuaaga lea ua faamatalaina ai lana galuega faa-aposetolo, 'o le faaaogaina e le Atua o lona faatauvaa.'

O Paulo e tupuga mai i le ituaiga o Peniamina (Filipi 3:5). O se tasi o tu e masani ai tagata Iutaia o e nonofo i fafo atu o Palesitina, o le lua o igoa e igoa ai, o le igoa Eperu ma le igoa Eleni. E le o iai ni faamaumauga e iloa ai le aso na fanau ai Paulo, ae fua atu i le vaitau na soifua ai, e tali tupulaga lava ma Iesu. Na galue i le galuega faa-misionare i le vaitau lea o le 35 ma le 60 tausaga o le ulua'i senituri. O le molimau a le tusi o Galuega (22:3), o loo ta'ua ai na fanau Paulo i Taso i Kilikia.

E leai foi ni molimau e iloa ai le tulaga sa iai lona olaga faa-tama tane. Peitai, a fua atu i tu ma aga ua masani ai le 'au Sa Eperu, o loo ta'ua ai sauniga ua masai ai soo se tama talavou Iutaia. O le lima o tausaga e a'oa'o ai le faitauina o le Tusi Paia; o le sefulu o tausaga e faitau ai le tusi o le Mishnah, o le tusi e a'oa'o ai le olaga faa-Iutaia. O le 13 o tausaga e a'oa'o ai le tusi o tulafono (Torah), a o le 18 tausaga e talafeagai ai mo le faia o se faaipoipoga pe a manao ai.

O le 30 o tausaga e amata faatino ai le galuega ua valaauina iai, o le vai taimi foi lea na amata ai le galuega tala'i a Iesu. E manatu le au su'esu'e o le Tusi Paia o le faasologa lea o le olaga faa-tama talavou Iutaia na ola a'e ai Paulo. Aua e malamalama lelei o ia i a'oa'oga ma talitonuga faa-Iutaia e pei ona atagia i ana tusitusiga.

Na a'oga Paulo ia Kamalielu (Gal.22:3) i mataupu ma a'oa'oga faa-Iutaia. O le molimau a le aposetolo i lona ola a'oa'oina ua iloa ai sa lelei ona a'oa'oina i tusi o le tulafono faapea tu ma aga faa-Iutaia. Sa galue Paulo o se fai fale'ie (1Kori 4:12; 1Tesalonia 2:9; Gal.16:37; 22:25-26). O loo ia ta'ua foi le tusi o (Filipi 3:5) sa avea foi ma faresaio.

Mai tusi e 27 o le Feagaiga Fou, e 13 tusi na tusia e Paulo: Roma, 1 ma le 2 Korinito, Kalatia, Efeso, Filipi, Kolose, 1 ma le 2 Tesalonia, 1 & 2 Timoteo, Tito, Filemoni.

O Paulo o se alii na a'oa'oina lelei i le potu ma le atamai faa-filosofia o le uluai senituri ma o loo atagia lea i ana tusitusiga. E iai taimi o loo iloa ai i ana tusitusiga ni finauga ma le au atamamai o Eleni e uiga i le taua o le Tala Lelei. 1 Korinito 1:25 - "Aua o le valea o le Atua e sili lona potu i tagata; o le vaivai foi o le Atua e sili lona malos i tagata."

O Paulo e le o se tagata tino ese, e tino iti lava, ae sa mafai ona ia onosa'ia tiga ma faafitauli uma sa feagai ma ia i le galuega. O Paulo o se aposetolo na matua tele sona sao i le galuega tala'i. Aemaise lava o misionare na mulimuli mai, o e na sauaina ona o le Tala Lelei.

## 3. Upu Faaiu.

E taua o tatou igoa, e le gata i le mafuaaga na faaigoaina ai tatou e o tatou matua, a o ni mea lelei e tutupu mai i o tatou tagata ua faaigoaina i ia igoa. Ua manino mai le soifua o le 'au soo ma aposetolo e pei ona ta'ua, le tulaga sa iai o latou soifua ma le ola valaauina e tusa ai ma igoa sa faasuafaina ai. Ma ua manino mai i lenei pepa, e tofua lava le tagata ma lona taua e tusa ai ma galuega ua tofia ai i aiga ma nuu o le atunuu faapea le Ekalesia. O le faatinoina lelei o ia nafa tausisi ma galuega ua tofia iai, o lo tatou sao lava lea e tusa ai ma igoa ua faaigoaina ai *faaauau itulau e 15*

# O E UA FAI I LAGI LE FOLAUGA

## Lemalu Sauileone Brown

7 Iulai 1952-17 Tesema 2017

O Lemalu Sauileone Brown, o le faletua o le tiakono ia Pula Mafi Brown i Sataoa Safata.

Na soifua mai Lemalu Sauileone i le aso 7 Iulai 1952 i Safaatoa Lefaga, ae valaauina e lona Matai i lona maota i Molley Green Place, Mount Roskill i Aukilani i Niu Sila i le po o le Aso Toonai 17 Tesema 2016, i le toe 15 minute i le 9pm. E oo mai le valaau pa'ia a le Atua ia Lemalu Sauileone ua 64 tausaga ma le 5 masina lona matua.

O ona matua, o lona tama o Tualatamaalelagi Taumuafono Milo Taimalietano o Safaato'a Lefaga ma Lotofaga. O lona tina o Faaitete Masinalupe Tikoa o Safaato'a Lefaga.

## O Le Taua o Soo Nei: Anetere'a, Peteru, Ioane ma Paulo

*mai le itulau e 14*  
tatou.

Tau lava ina manatua e le o tatou na mafua ai, e le mo i tatou foi; ae mo tatou matua, o aiga ma nuu ma le atunuu, a ia faasilisili ai mo le Atua. E pei o se faamanatu taua lea ua mafai ona maua mai lenei pepa, o a lava fe'au ma galuega ua tofia iai, o a lava foi igoa ua faasuafaina ai Atatou finafinau ma le faamaoni iai, o le avea lava lea o tatou ma soo poo apositolo ua auina atu, i soo se vaipanoa mo le galuega a le Atua i lenei lalolagi.

Na faaipoipo atu Lemalu Sauileone ia Pula Mafi Naite Brown i le aso 23 Mati 1973 i Aukilani Niu Sila, ma e to'a fa le la fanau. E lua teine ma tama e to'alua. E to'a 15 fanau a ana fanau.

Na faauuina lo la tofi tiakono i le aso 19 Aperila 1974, i le Pulega a Aukilani Niu Sila e le Susuga i le Toeaina ia Siaosi Ieriko. Sa galulue i la'ua i le aulotu EFKS i Sandringham, a o faifeau ai le Susuga ia Seuga ma le faletua ia Tupe.

O Lemalu Sauileone Brown sa fai o ia ma failautusi a le Mafutaga a Tina o le Ekalesia i Sandringham, a o alo le Ekalesia i Sandringham mo le fausiaina o le malumalu o loo iai nei. E 26 tausaga sa tautua ma auuina ai la'ua i le aulotu i Sandringham - 1972-1998.

O le faletua ia Sauileone o se tina e fiafia lava i taimi uma. E le o se tina e te vaai atu o fa'a'u'u mai. O se tina e loto alofa i soo se tagata; e talitonu foi i le lima foa'i mo le lotu aemaise ai le tausiga o le faifeau. Faapea foi ma ona aiga.

O le ala na tuua ai le aulotu i Sandringham ona ua latou siitia i le latou nofoaga fou i Blockhouse Bay. O lea na latou lolotu ai i le aulotu EFKS Blockhouse Bay i le Toeaina Faatonu ia Talalelei Poasa ma le faletua ia Malia i le tausaga 1999.

Ina ua tuumalo le Susuga i le Toeaina Faatonu ia Talalelei Poasa, ona latou valaauina lea o le Susuga ia Sesela Tolovaa ma le faletua ia Litala a o avea i la'ua ma faia'oga o le Kolisi Faafaifeau i Malua. Sa latou galulue ma le faifeau ma le faletua i le Ekalesia EFKS Blockhouse Bay se'ia oo i le tausaga e 2010 ona faamavae ai

lea i le Susuga ia Sesela ma Litala ma le aulotu EFKS i Blockhouse Bay ae malaga i Samoa e tausi o la matua ua matutua - tausaga 1999-2010 - 11 tausaga.

Sa galulue la'ua i le Ekalesia EFKS i Sataoa i Safata, lea o loo faifeau ai le Susuga ia Falefa ma le faletua ia Faamita Matatia - 2010. Sa tau'ave lo la tofi tiakono i le aulotu i Safaato'a e tusa ma faiga faavae a le Ekalesia, a o le Matagaluega a Falealili Safata ma Siumu.

O le Fono Tele ia Me 2015 na amata ona gasegase mai ai Lemalu Sauileone, ma e ui ina tigaina ae naunau pea e faatino lana tautua i le Ealesia e ala i lana Mafutaga a Tina i Sataoa. O se tina foi e le aunoa ona mafuta i lona Atua e ala i le tatalo i le ao ma le po. Ina ua mae'a foi le Fono Tele ia Me 2016, na toe sii mai la'ua i Niu Sila i le falema'i tele i Aukilani mo sona fesoasoani. Ae paga lea, ua siliga tali i seu se fesoasoani a foma'i.

Na naunau lava o ia e fia fo'i i Samoa i le Po Siva a lana Mafutaga a Tina e faia i le faaiuga o Tesema i Sataoa, EFKS. Peitai ua le'i taunuu lea ona ua valaau lona Matai ia te ia.

E maluu Lemalu Sauileone Brown ua 64 tausaga 5 masina lona soifua. Na fai lona lotu faaleaiga i le malumalu o le EFKS i Mt Roskill i le Aso Lulu 21 Tesema 2016, na ta'ita'i lava e a'u. Na faitauina le Tusi Paia e le A'oa'o Fesoasoani ia Lauama.

O ona toe sauniga na faia i le taeao, aso 22 Tesema 2016 i le EFKS Mt. Roskill. Ta'ita'i Susuga Iosefa Tiata, lauga le Susuga i le tama penisione ia Maligi Evile FT, tatalo ma le faitauina o le Tusi Paia, Susuga ia Auvaa Eneliko, ona faaiu ai lea i lona oliolisaga tumau i Mangere Cemetery i Magele.


Amuia Lemalu Sauileone e valaau mai lona Matai o loo faapea lava ona ia faia lona finagalo.

Letioa foi ona a le aunoa ona e  
*faaaauu itulau e 16*

# O E UA FAI I LAGI LE FOLAUGA

## Faapaia Tariu FS

5 Oketopa 1952-21 Ianuari 2017



O le Aso Faraile 3 Fepuari 2017, i le 10.00 i le taeao, sa faia ai i le malumalu o le EFKS - Vailoa-uta Faleata, le toe sauniga o le Susuga Faapaia Tariu FS.

O le Pulega a Faleata Sisifo sa feagai ma le sauniga, sa ta'ita'i le Toeaina ia Faauga Mata'utia FT; o Eletise Suluvale FS sa faitauina le Tusi Paia; o Iosefa Afutiti FS sa fofogaina talosaga; o le Toeaina Faatonu o le Matagaluega a Faleata, o le Ta'ita'ifono foi o le Komiti a le Au Toeaina ia Tavita Anesone FT, sa saunia le lauga.

O molimau o le aso - faletua ia Sinavaiui Faapaia Tariu; o le sui o le fanau, o sui o aiga na lua; o Siolo Tauati FT (mo la latou tausaga Faaiuso i Malua); o le Ta'ita'ifono o le Fono a Ekalesia Soofaatasi, Susuga Kasiano Leaupepe, o le Palemia o le Malo o Samoa, Afioga Tuilaepa Sailele Malielegaoi (PM); o le Failautusi o le Matagaluega a Faleata, Susuga Larry Tofaeono FS; ma le sui o le Pulega a Faleata i Sisifo, Tautua Aurelio FS.

O le aso 27 Iulai 1979 na osia ai le feagaiga ma le EFKS i Lefagaoalii Safune i le Matagaluega Itu o Tane. O le aso 8 Fepuari 1986, na osia ai le feagaiga ma le EFKS i Vailoa Faleata i le Matagaluega a Apia Sisifo. O le masina o Aperila 1992, na osia ai le feagaiga ma le EFKS i Vailoa-uta i le Matagaluega Faleata; seia valaauina e lona Matai.

Sa avea ma failautusi o le Matagaluega a Apia Sisifo, sa avea foi ma failautusi o le Matagaluega a Faleata. Sa avea ma sui usufono o le Matagaluega a Faleata i le Komiti Faamisionare. E maluu nei le Susuga ia Faapaia Tariu FS o avea ma sui usufono a le Matagaluega Faleata i le Komiti Tupe ma o le failautusi foi o lenei Pulega Faleata Sisifo.

O le Toeaina ia Faauga Mata'utia

## Lemalu Sauileone Brown

7 Iulai 1952-17 Tesema 2017



### mai le itulau e 15

vivii e pei o la le fai Salamo: "Lo'u agaga e, ia e faamanu atu i le Alii. O mea uma fo'i oi totonu ia te a'u, ia faamanu i lona suafa pa'ia."

Tofa Soifua Lemalu Sauileone Brown. Faafetai mo mea uma. Manuia lau malaga; tatou toe feiloa'i i se aso.

Iosefa P. Tiata FS,  
EFKS Mt Roskill  
Aukilani Niu Sila

FT, sa ta'ita'iina le toe sauniga o le Susuga ia Faapaia Tariu i lona tuugamau, i lona aiga i Vaitele-uta, ma matou faamavae atu ai ia te ia i le pese - Talofa uso e, tofaina oe. Tofa! Tofa! Tofa!

**Saunia e Tautua Aurelio FS.**

## O le Fafine ua oti lana Tane

Na faafuase'i ona oti le tane a le fafine i se faalavelave faafuase'i, ma tuua ai na o ia ma le fanau e to'alua. I le amataga sa toatele lava ana uo ma nisi tagata e alolofa atu, asiase atu, ma avatu mea'ai, ma tatalo foi mo ia ma lana fanau. Na o lona toe fia faalogo i le leo o lana tane. Fia moe i ona tafatafa; fia 'u'ulima ma savalivali i le togalaau, ma faalogo i lana 'ata'ata ma tausua ma ula mai ia ia.

Na oo ina maui atu le toatele o uo ma e masani e asiase atu, ma oo ai ina mamafatu lona faanoanoa. Fetagisi foi tamaiti i le tele o taimi ma fesilisili i lo la tama poo fea o iai. Tau faamatalatala atu lava iai le uiga o le oti ae le malamalama tamaiti. Sa alu i lona potu ma faapupuu ai ma tagi ma ta'uta'u le igoa o lana tane. E maua atu foi o ia e lana fanau i nisi aso o tagi ona fesili lea, "Mama, aisea e te tagi

soo ai?" Ae tali iai, "Ou te misia foi Papa pei o oulua."

A o le isi aso, ina ua atoa le tausaga talu ona oti lona to'alua, le taeao popogi, e le'i ala le toatele o tagata, ae savalivali atu i le tuugamau o lona toalua, ma lona vaai atu, ua tuu mai ai le teufugalaa fou i le tuugamau, ma o loo pipii ai ma le pepa. Na ia talatala le pepa ma ia faitau upu o loo iai: "Ou te manatua fo'i!" "I remember too!"

A o lea na ia manatu e le o toe manatu mai se isi ia te ia ma lona aiga.